

四庫全書

集部

欽定四庫全書

石倉歷代詩選卷一百七十七

明 曹學佺 編

宋詩五十四

周必大

次韻趙公直賞心亭

晉人誇新亭假日輒高會中間伯仁輩未免楚囚對江  
山猶古昔人物更草昧東郊今保釐翠華記行在佳麗

壓漢楚追遊盛冠蓋茲樓貫城雉于返無小大令威雖  
不歸靈光故無礙烟雲互明滅川郭相映帶當年烏衣  
遊此日思一槩從容值休沐登臨多慷慨幽懷忽軒豁  
細故絕芥蒂已尋詩社盟更許食期戒佳賓滿座上好  
語來天外舟移白鷺遠目送飛鳥快方種淵明秫粗免  
監河貸一醉儻可期與君時倒載

陶淵明有已酉重九詩一首某以此年此日舟  
次吉水距永和才一程耳輒用其韻先寄二

兄十三弟并呈提舉七兄

王覲十五載歸來稀舊交我髮昔已華今茲固宜凋去  
國甫重五還家倏登高永和有兄弟咫尺如烟霄緬懷  
江東使地遠心更勞遙知上翠微江山勝金焦豈無菜  
萸酒望望心鬱陶相從會有日永矣非一朝

次韻史院洪景盧簡詳館中紅梅

紅羅亭深宮漏遲花開外人誰得知蓬山移植自何世  
國色含酒紛滿枝初疑太真欲起舞霓裳拂拭天然姿

又如東家窺墻女施朱映粉尤相宜須臾臙脂着雨落  
整粧俯照含風漪遊蜂戲蝶日採掇嗟爾何異氓之蚩  
提壺火急就公飲他日墮馬空啼眉

漁父四時歌

三湘七澤雲連水短棹意行無遠邇江花時傍綠蓑飛  
水鳥忽隨清唱起醉從歡呼踏浪兔鮪可鱠兮秔可炊  
芳草從教天樣遠都無間恨寄萋迷碧桃幾片來何處  
試訪秦人武陵路

朝霞沈綺鳥鵲驚釣車徐理根一鳴夕蟾散金鷗鷺浴  
乘流蕩槳清江曲行人亭午汗如流綠陰濃處找扁舟  
絲綸卷盡身無事日長睡足風颼颼覺來一觴仍起舞  
未信人間有炎暑

世人只詠江如練此景何曾眼中見露零月白人已眠  
萬頃風光儂自占蓴鱸况復生計優酒醒還醉餘何求  
有時閒看飛鴻字斜倚篙竿不掉頭曉來誰誤招招渡  
一笑黃緣葦間去

白浪粘天雲覆地津人斷渡征人喟欲矜好手傲風波  
故把扁舟恣遊戲雪簑不博狐白裘尺寸之膚煖即休  
賣得魚錢沽美酒翁媪兒孫交歡酌田家禾熟疲輸送  
樂哉蓬底華胥夢

二月十五日同兄弟甥姪遊西山次子戴韻

地飲成真率天風怒澀慳臺臨平野迥人對老僧閒已  
是尋春至仍容戴月還郊坰如有此能不數追攀

遊雲光寺李提舉庚領客將至留詩奉呈

來如負弩先去為來驄避江祖一片石留伴幽人醉作  
者正七人飲中空八仙長齋詎容醉晉也合逃禪

直徽猷閣邵及之挽詞

不殖千金產惟求十畝園湖山堆几席花木報寒暄曾  
是尊前客常思醉後言懷賢空有淚無路灑新原

胡元之提刑迂塗相過寵示二詩次韻為謝兼  
簡趙再可經畧張君量運使

外計初馳傳元戎久奏功馬牛非北海雞犬是新豐梅



萼三冬綠榴花四季紅德星臨越分桂海即吳中

次沈作式署園詠

宮槐分影直官柳着行踪畫棟飛翬遠晴霞散綺餘池  
邀山簡馬水勝武昌魚只恐封泥召驂鸞上帝居

送陸聖脩府赴春闈

送君南浦慘離情握手依依數去程日薄雲濃風轉勁  
江寒水落浪還生此時執別仙舟穩後夜相思山月明  
好把嘉謀獻丹宸中興天子急昇平

舟行憶永和兄弟

一掛吳帆不計程，幾回繫纜幾回行。  
天寒有日雲猶凍，江濶無風浪亦生。  
數點家山常在眼，一聲鴻雁正關情。  
長年忽得南來鯉，恐有音書急遣烹。

次韻丁維臯糧料憐牡丹未開

拙速那能鬪巧遲，從教綠暗與紅稀。  
天香未染蜂猶懶，日幄先籠蝶已飛。  
羯鼓只應催上苑，鶴林誰復倩紅衣。  
請君多釀淮南米，縱賞先拚倒載歸。

次韻廣東芮漕時聞其部中寇退而湖湘之民  
方避地來此

笑酌貪泉為賦詩凜然清節照南夷  
廐空不納如羊馬才大常嗤捕鼠狸  
盜已犇秦非地險心遲去魯只天知  
愛君勤把歸鞍促莫待鸞旗訪具茨

胡邦衡相過賞金鳳花許詩未送邦衡復作木  
犀會二花殆是的對偶成四韻

身間端合醉秋光兩地名花况並芳  
金作鳳形如許巧

木成犀理若為香髻頭自笑辜釵色沙面誰知識帶黃  
莫閉詩壇偃旗鼓天生的對欠平章

楊文甫主簿傾惠佳篇今赴松溪次韻送別

投林勸翼久知還尚客君家伯仲間入市每嫌妨杖履  
臨岐那忍問河山家聲好在金陵簿人物爭看玉笋班  
他日銀黃夸里後不妨徐步野夫閒

邦衡再送皇字韻來詩仍次韻

賓鴻列陣競隨陽却向丹山隱鳳凰銀管題詩紛滿帙

金釵度曲儼分行漢宮早促三更席梁苑行稱萬壽觴  
顧我飄零無着處非公湔袂尚誰望

戴子微運使出使湖北約以惡語送行而未遣  
也佳篇見督次韻奉寄

早日逍遙侍從間重來奉引近威顏倦趨北闕晨霜冷  
思上南樓夜月間直指不誇新衣繡曲臺猶記舊聯班  
豈知隔面心猶渴空訝相如下筆慳

文潞公居洛有丙午同甲會時今執政府凡三

位樞密使王季海叅政錢師魏與某連牆而  
居適然齊年時號丙午坊次文公韻

四公八十會伊川盛事于今又百年  
宣憶蒼顏華髮叟  
亦陪黃閣紫樞仙府居未至容連棟  
班路遙瞻愧比肩  
丁丙連干如合德君臣慶會豈虛傳

三月六日中宮生辰二府例以前四日就孤山  
四聖觀設醮泛舟至玉壺環碧園因記歐陽  
公治平三年丙午歲上巳和韓丞相詩輒借

元韻賦簡諸公

東華正踏軟紅塵却起西湖袂辰歷似明天時令正  
春逢閏歲物華新流連花柳輸豪俠判斷湖山愧隱淪  
尚擬鳴鸞一猶豫還陪英袞奉嚴宸

送廣西譚景先經幹魚簡趙帥思朱漕晞顏

舊歷南流上海航今經鐸背下灘江元戎正直詩書帥  
廉使曾臨父母邦不憚客從南去少須陪驛召北來雙  
水衡自古同承拜豈必紅蕉映碧幢

上巳訪楊廷秀賞牡丹于御書扁傍之齋其東  
園僅一畝為術者九名曰三三徑云

楊監全勝賀監家賜湖奚若賜書華回環自斷三三徑  
頃刻常開七七花門外有田聊伏臘望中無處不烟霞  
却慚下客非摩詰無畫無詩只謾誇

僕營小圃方兩月張坦夫示映莊圖有起余之  
意輒成鄙句

百年種德十年栽映帶雲巖與月臺無間四時留客醉



何曾一日不花開人人爭羨富登覽物物豈知工剪裁  
我比樊須身更老祇今學圃亦悠哉

彭孝求惟孝以綠野行送芍藥數種鄙句為謝  
占斷春光及夏初瑠璃剪葉采珊瑚休論花品同而異  
為詠詩人樂且訂北第莫辭金鑿落南禪爭看玉盤盂  
彭宣微恙何妨醉自有嬌癡婢子扶

魚兒牡丹得之湘中花紅而葉白狀雙魚縈相  
比枝不能勝壓而下垂若俛首然鼻目良可

辨葉與牡丹無異亦以二月開是得名其幹  
則芍藥也余命曰花嬪而賦是詩聞江中山  
谷甚多

天教姚魏主芳菲合有宮嬪次列妃玉頸圓瑤宜粉面  
霞裙深染學翬衣枝頭窈窕魚雙貫風裏踟躕鳳對飛  
莫把根苗方芍藥留春不似送將歸

次韻廷秀待制玉藥

姑射山前雪照人長安水畔態尤真步搖翹玉中心碎

瓔珞塗金四面勻常笑茶蘼藏琅藥應陪芍藥殿餘春  
自從唐代來天女直到平園見後陳

丁巳二月甲子蜀錦棠海棠盛開適有惠川繡  
錦棠記者招伯威德源為齊年會次舊韻

曾因客夢到西川萬戶疏封只隔年花重錦官思杜老  
鶴飛沙苑看徐仙衰顏尚許任爭齒淺量深慚賜及肩  
照眼蜀粧依繡幌共鸞十載讖先傳

平江顏侍郎度挽詩

吳門自古俊人多中外推公政事科議禮不妨豐酒課  
治繁猶暇講禪那榻前屢記宣除日川上遙憐逐逝波  
底用鐫碑紀廉直鄉評正自不消磨

送韓道希亞卿移漕江中

饋餉隨蕭不作難秦淮金峴漢時關天開虎踞龍盤處  
地近鷄翹豹尾間洗印先經三峽寺觀風徧踏九華山  
盡收竒秀歸詩稿却起賡歌供奉班

朱叔止軫通判屢示詩詞綽有家法輒次年字

韻一篇兼簡汪仲嘉敷學樓大防顯學二尚

書

筆勢犇騰沒大川談鋒激烈敵丁年花開共入長春苑  
柯爛爭看不老仙灑笑君先聽漢履上征予已拍洪肩  
自從今日親漁釣恐有三賢尺素傳

丙辰七兄有詩及人月分圓已未彼此服藥未  
能夜坐次韻為重九之約

初非遠道思綿綿自是岑岑懶涉川咫尺却成千里隔

蹉跎還負十分圓，坐看碧落飛金鏡。  
遙想黃樓運筆椽，寬約重陽各強健。  
登高同賦去年篇。

次韻章茂獻射茶

墨淡名高筆有花，胞中五色補皇家。  
諫書夜奏常焚藁，講舌時乾每賜茶。  
秘祝重尋丹竈火，長生元笑紫河車。  
新詩有味知何似，雙井春來試白芽。

茶園王琰求清暑堂詩次王氏瞻數文胡邦衡

資政二公舊韻

早遮西日覓王官  
晚倚南窗審膝安  
疊疊清風揮塵落  
紛紛蒼雪着空寒  
花前白酒傾雲液  
竹裏行厨洗玉盤  
江月上時涼易足  
四絃三弄寫驚湍

李子西卿月乙卯秋試畢携家兄舊時相過索

次韻

三日揮毫迥出羣  
貳師西伐有竒勲  
便從蟾窟升金掌  
休戀江東賦暮雲

中秋古梅盛開次子兄中允韻

抱甕畦夫破井台炎天日日灌陳芟預支春夜無聲雨  
羸得水花帶葉開

吳斗南仁傑架閣求夢芳亭詩

屈平流放楚江臯蕭艾叢中思鬱陶君是國香人服媚  
詩情端合古離騷

附趙昌父詩

小園早作

今朝欣雨止天氣漸柔和籬落小桃破階除馴雀多占



方移果樹帶土灌蔬科農務侵尋及吾寧久卧疴

連雨

夜窓連曉枕城郭與山林旱苦七八月雨欣三日霖殊  
勝建武穀更念櫟陽金斗食端何直胡為久滯淫

雨望偶題

漠漠青山雨霏霏白露烟詩材來遠近畫幅極中邊流  
落雖天外登臨賴目前浮生才幾日此地欲三年

雨中不出呈斯遠兼示成甫

湖外頻年客江東邇日歸欲知年事迫看取鬢毛非寄  
意雖梅柳關心在歲薇令予倒屣屢須子叩柴扉

嚴先輩詩送紅梅次韻

盡道梅花白能紅又一奇渾疑丹換骨不是酒侵肌看  
此數腴色思儂少壯時盛年雖不再猶擬歲寒知

分界鋪愛直驛張安道因杉製名而驛之前有  
老梅一株不知安道何為捨彼而取此也

杉自誰人種梅從何代栽腹空雷有擊根瘦土無培要

是百年物曾經幾客來直哉雖見錄清矣可遺材

憶梅

縱乏幽人宅猶餘大樹祠帶山仍帶水宜飲亦宜詩勿  
待全開後當乘半放時昏昏郭陰霧皎皎上朝曦

榴花

樹陰看已合榴朶見初明當夏豈無意避春真有情花  
雖後文杏實可待瓌橙病叟緣何喜留苔看落英

送王子遵赴衡陽丞

王郎妙人物獨步尚江東  
昔尉既不醉今丞寧肯聾  
相依唇齒國忽去馬牛風  
清絕官曹外何年著我同

螢火

渾忘生朽質直擬慕光輝  
解燭書帷靜能添列宿  
稀當風方自表帶雨忽成  
微變滅多無理榮枯曾一歸

蛺蝶

不逐春風去仍當夏日長  
一隻還一隻能白或能黃  
戀戀不能已翩翩空自狂  
計功歸實用終自愧蜂房

暖甚去綿衣

誰道江南春有寒未經社日衣能單桑麻過雨日夜長  
桃李因風高下殘舊說中州政如此了知瘴氣不能干  
天公似憫斯民病故體淳熙詔令寬

十一月五日晨起書呈葉德璋司法

卧聞落葉疑飄雨起對空庭蓋卷風政自摧頽同病鶴  
况堪吟諷類寒蟲忽思有客渾如我却念題詩不似公  
已分葑鹽終白首可因霜雪愧青銅

次韻葉德璋見示

窮冬未省見梅班故里何由投竹安歸意寧須卜以決  
衰顏休待鏡頻看交情謝子來今雨節物娛予後苦寒  
獨酌更憐終漫興不如骺骹得天歡

上巳

朝來一雨快陰晴東郊百鳥間闐鳴受風柳條不自惜  
蘸水桃花可憐生不見山陰蘭亭集况乃長安麗人行  
東西南北俱為客且送江頭返照明

梅花

平生欠汝哦詩債歲歲年年須要還未至臘時須訪問  
已過春月尚躋攀直從開後至落後不問山間與水間  
却笑淵明賦歸去庭柯目盼自怡顏

又

全樹婆婆夥匪奢數枝纖瘦少尤佳春風上苑吾何忝  
落日孤村汝自嗟定論要為塵外物飽看寧是世間花  
不然山谷能詩老曷與山礬定等差

頃與公擇讀東坡雪後北臺二詩歎其韻險而  
無窘步嘗約追和以見詩之難窮去冬適無  
雪正月二十日大雪因用前韻呈公擇

細思不是冬無雪留待春風鬪冷嚴病骨未憂衣乏絮  
早餐寧歎食無鹽梅添鑿落衣同色竹擁參差半入簷  
坐守地爐應不厭破窓頻見北山尖

雪埋老屋無薪賣晨起謀炊自毀車覓飽預期千頃麥  
破慳先試一春花便營野屐尋茶戶更約緜袍當酒家



處士祇今疑姓賈壁間但沒掛錢義

石倉歷代詩選卷一百七十七

欽定四庫全書

石倉歷代詩選卷一百七十八

明 曹學佺 編

宋詩五十五

羅願

鹿鳴燕禮成貽解元諸友并呈通判寺簿兄及  
同官

鹿鳴首宵雅義取好賢深寥寥疑莫續工席有遺音詩

言君臣間不以位相臨如禽食革水有酒方共斟從容  
陳所好亦復有鳴琴庶使戎冠者洋洋動其心願言解  
子褐結綬貫華簪真心有相感千載豈殊今

又

士或未就駕郡守身勸之君觀漢詔中有此勤懇詞由  
來賢俊人出處每委蛇譬彼未嫁女深閨秀容姿施衿  
有所適婉孌終自持炎俗尚如此上世當可知勉哉策  
名者不但好爵縻君臣正明良行矣方自茲惟當秉高

節長副此心期

望梅亭

節物重陽後風烟庾嶺頭  
休論梅子雨纔度菊花秋  
翠壁堪橫絕幽亭勸小留  
謀生兄弟拙一一傍南州

奉寄交代通守王兄兼簡胡君

藉甚王文度同儕意自親  
方舟能送我別駕苦勞人  
屬縣應如律山田向食新  
荷花開幾許老子舊凝神

其二

有客纔相識，乖離又許時。  
不愁蓬轉速，獨恨蓋傾遲。  
卑薄江南地，青冥歲晚期。  
宦遊妨意氣，直恐負君詩。

次韻酬通判劉兄岳陽樓見懷

蓄納深無際，憑臨勢易高。  
青春關氣象，白日散風濤。  
有野張軒樂，何人續楚騷。  
古來川浸在，閒却漢陰槲。

其二

魚龍掀舞後，渺莽記空庭。  
地帶三苗濶，山傳二女靈。  
客懷光水月，詩筆妙丹青。  
少作揚雄悔，惟思草一經。

和汪伯虞求酒

君不見菊潭之水飲可仙酒旗五星空在天此江穀紋  
更竒絕投以麴米清如泉分甘正擬供低唱要築糟臺  
須大匠詩人便欲醉千日歡伯僅堪陪一餉曰余此樂  
未知之獨愛為瓶居井眉因君飲興亦浩蕩夢隨驂駕  
觴瑤池昔賢酒盡猶長吸大似竹枯還欲瀝明朝秀句  
傳滿城笑指空樽卧墻壁

送邕州吳使君

題輿纔赴日邊程便擁油幢鎮列城地望素高唐五管  
人才今似漢三明時清市駿非無意歲晏逢花好寄聲  
太學英名湖海氣此行持論要和平

次韻和子澄春祠先聖律詩

天明悅洗動輕漪禮殿巍巍百世師伏几親瞻古人象  
陪祠頗雜漢官儀詩書自可謀元帥俎豆何妨示小兒  
春服詠歸千古意只今童冠可無詩

福州趙侍郎開城西古湖以溉田既成冀得致

政丞相福公一臨于是有唱和之篇

湖邊飛蓋欲誰同  
治行人思舊弱翁  
行樂未饒溱洧女  
桔槔應謝漢陰風  
閩山影浸烟雲動  
滄海潮連浦溆空  
欲識元侯疏鑿意  
君王勤儉正卑宮

虛靜堂

華堂清曠隔喧卑  
戶外春殘綠滿枝  
好鳥窺簷時下啄  
有人燕坐獨支頤

息齋



世間誰號最閒忙  
強健收身意自涼  
春去掃花時汲井  
客來剪韭旋炊粱

茶巖

巖下纔經昨夜雷  
風爐瓦鼎一時來  
便將槐火煎巖溜  
聽作松風萬壑迴

木爪塢

山中果樹略扶疎  
炎帝經中未盡書  
聞道木爪紅勝頰  
露枝雲葉綴華琚

附羅從彥詩

挽吉溪吳助教

室富真儒業門多長者車明經方教子得第已榮家性  
守仍知分天然不愛奢百年成古昔何故亦咨嗟

其二

新生誇躑躅舊德歎凋零冷帶商巖月光凌處士星布  
衣難得祿白首易窮經追想今何在溪流對洞門

和延年巖桂

幾樹芬芳氣欲沈  
枝枝若占鄰家林  
風搖已認飄殘菊  
日照渾疑綴散金  
仙窟移來成美景  
東堂分去結清陰  
我今不願蟾宮折  
待到秋宵把酒吟

觀書有感

靜處觀心塵不染  
閒時稽古意猶深  
天機畢露其中意  
與理休從此外尋

顏樂齋

山染嵐光帶日黃  
蕭然茆屋枕池塘  
自知寡與真堪笑

賴有顏瓢一味長

邀月臺


低作垣墻小作臺時邀明月問誰開  
夜深獨有長庚伴不許庸人取次來

送南劍王守歸

未把陽關三疊吟且將詩句寫離心  
千尋浩浩鐔溪水別恨不知誰淺深

題一鉢庵

可憐萱草信無憂誰謂幽蘭解結愁欲得寸田離荆棘  
只消長伴赤松遊



石倉歷代詩選卷一百七十八

欽定四庫全書

集部

石倉歷代詩選卷一百

七十九上至  
八十二

詳校官庶吉士臣范逢恩

侍讀臣孫球覆勘

總校官進士臣朱

鈐

校對官中書臣葉

蘭

謄錄監生臣張

護

欽定四庫全書

石倉歷代詩選卷一百七十九上

明 曹學佺 編

宋詩五十六上

呂祖謙

送宗子華通判長沙

代叔祖知錄作

騷人故態秋九辨播三楚宋公舊題壁文彩照潭府千載得君侯遙遙接華緒還當初秋天又進湖湘艣當家

多勝事此役可兼取江山日日新似若相勞苦木脫獻  
羣峯雲生失前浦况持別乘權光華動徒旅元戎下分  
庭百吏羣趨廡後車載仁風習習被南土預知潢池盜  
無復驚枹鼓政當勸賣劍不必禁挾弩入獻有訂謨論  
賞駢圭組臨分一杯酒不為離愁舉

送丘宗卿博士出守嘉禾

攜李國西門道里去天咫訟庭人摩肩客館舟銜尾涼  
燠變須臾風俗怵駭視心平理自見周道本如砥堂下



萬休戚堂上一笑嘖是心苟不存對面越與秦豚魚尚  
可孚况此能言民君看津頭柳葉葉皆相親奮髯疾抵  
几解衣徐探籬古來多快士氣吞兩輪朱簿書高没人  
迎筆風摧枯自許豈不豪歲晏終何如

城樓

城峻先迎月簾疎不隔風棋聲傳下界雁影沒長空島  
嶼秋光裏樓臺海氣中登臨故待晚雨外夕陽紅

野步

石梁俯清流苔髮明可數  
茆簷春晝長寂寂亭陰午  
鳥啼花徑深風絮浩無主  
幽人不可覩棋聲時出戶

鞏采若府推母錢夫人挽章

內助功推冠名成父子間  
中原遺俗盡舊族素風還  
石窳天開邑宮門日綴班  
光華竟何許夕照在西山

王龜齡詹事挽章

諸老收聲盡佳城又到公  
蒼天那可問吾道竟成窮  
旌卷莆田雨簫橫雲浦風  
今年襟上淚三哭萬夫雄

魏元履國錄挽章

麻衣見天子拜䟽不知休  
落落山林氣拳拳  
呷畝憂極知千載遇政用  
一身酬繞舍閩溪水朝宗日夜流

題歸菴

雲壁開蒼峽風林卷翠濤  
諸松皆老大一嶂獨孤高  
發興雖公等尋幽許我曹  
秋光端可賦不是楚人騷

王通直挽章

近來南國家半是北人墳  
異縣誰憐我同鄉又失君  
深

居傳雅尚堅坐挹清芬日落長安第三槐拂暮雲

與同館遊張氏園分韻得日字

出日厭囂塵入門倦佔俾駕言城北園滯思頓消釋方  
池環脩篁廣陌衛行粟先雪梅已苞後霜草猶茁上躋  
極高明旁穿復深密主人真喜事秀句屢盈帙招呼文  
字飲及此三餘日山林與鐘鼎零茂本非匹斯遊豈偶  
然書板記甲乙

寄章冠之

章侯平生一詩囊，酬風醉月徧四方。浩歌姑熟酒淋浪，  
醉呼太白同舉觴。遂登浮玉臨渺茫，江濤挾筆益怒張。  
沙頭倚檣樂未央，興闌忽上秋浦航。門前槐花日夜黃，  
閉門琢詩聲繞梁。白袍紛紛渠自忙，飄然邂逅非所望。  
自言久厭世鎖韉，合眼已夢廬山蒼。君才甚碩氣方剛，  
身雖欲隱文則彰。江湖故人半朝行，左推右挽摩天翔。  
而我戢翼甘摧藏，不能與俗相迎將。徑當行前掃山房，  
俟君功成還故鄉。却駕柴車迎路傍。

送柳嚴州解官趨朝

一葉初秋已趣裝，璽書頻下駐歸艍。  
少留北闕三年最，多借西州半歲強。  
身外寵榮元自薄，眼前凋瘵故難忘。  
書囊知有朝天草，豈是中和樂職章。

蘇仁仲計議挽章

幽棲略具便休官，帝遣蒲輪喚不還。  
大似文元居道院，又如白傅過香山。  
夢回帷幄青冥上，醉墮風波浩蕩間。  
向使胸中有榮辱，那能八十鬢毛斑。

其二

登門疇昔奉從容  
婺越之間一水通  
今日江東無賀老  
去年牀下拜龐公  
舊來論議多遺落  
新出傳聞或異同  
已矣從誰判真贋  
汗青連屋未施功

向運使挽章

戟衣翻戶映庭槐  
使節州符未展才  
文獻定知丞相似  
淵源還自洛陽來  
異端惑世深于蠱  
古學違時冷若灰  
從此湖人識喪禮  
凜然治命手親裁

何茂恭母王夫人挽章

南朝人物盛諸何壽母皤然樂事多堂下無憂管美色  
天邊有信桂交柯黃金籊滿經方重白玉樓成恨未磨  
空誦安仁舊時賦版輿零落故山阿

次韻葉丞相陳尚書遊南園

樂事良辰古所難三分春色一分寬潤花雨過紅裙濕  
倚竹風斜翠袖寒自有南堂誰舉白可無東絹為施丹  
兩翁醉墨曾題品便作平泉草木看



送喻叔奇通判會稽

鳴騶前日餞，出使椎鼓今日送。作州會稽別駕官尚薄，  
道傍羨者何其稠。版輿有親餘九十，東南之美供甘柔。  
先春鑄牙入午啜，破臘箭茁克晨羞。况復詩壇執牛耳，  
所至風月相獻酬。千巖萬壑徧題品，會有采者人名遒。  
賀車駕幸秘書省二首

麟臺高柳識雕輿，共記中興幸省初。黃道再傳天子蹕，  
青編重入史臣書。需雲下際君恩盛，宸露高張樂節舒。

若寫鴻猷參大雅定非周鼓頌田漁

其二

紫清丹極與天隣闔闢乾坤繫笑嘖獨為斯文回一顧  
坐令吾道重千鈞先王舊物參差見列聖明謨次第陳  
墨客區區感榮遇豈知深意在彛倫

西興道中

鳧鷖迎船似有情隨波故起綠粼粼  
野花照水開無主誰信春歸已兩旬

春日三首

短短菰蒲綠未齊  
汀洲水暖雁行低  
柳陰小艇無人管  
自送流花下別溪

一川曉色鷺分去  
兩岬煙光鶯喚來  
徑欲卜居從釣叟  
垂楊缺處竹門開

簷鐸無聲鳥語稀  
徑深鐘梵出花遲  
日長徧遶溪南寺  
未信東風屬酒旗

晚春

風絮流花一任渠北窗高卧綠陰初閉門春色閒中老  
為謝平生董仲舒

遊絲

遊絲浩蕩醉春光倚賴微風故故長幾度鶯聲留欲住  
又隨飛絮過東牆

祭酒芮公既沒四年門人呂某始以詩哭之

少年把筆追班揚咳唾珠璣落四方歲晚寒窗渾忘却  
瓦爐香細雨聲長

其二

聞人有善已伸箸倒廩傾困更不疑  
莽莽萋萋竟何許  
卷阿空老鳳皇枝

其三

先生墓木已成圍  
弟子摧頽晝掩扉  
大雪繁霜心境寂  
有時清夢尚摳衣

送朱叔賜赴閩中幕府二首

止戈堂上履聲閒  
飛蓋相追杳靄間  
君到定知難入眼

倚天瀟霍是家山

路逢十客九青衿半是同窗舊弟兄最憶市橋燈火靜  
巷南巷北讀書聲

題劉氏綠映亭二首

涼葉翻翻不受塵芒鞋藤杖及清晨開窗小放前溪入  
澄綠光中獨岍巾

鷺浴魚跳在鏡屏搖青浮碧太鮮明牆東種得陰成幄  
隔葉看來却有情

夜宿浦城魚梁徐刪定于出示林謙之挽其父

二詩時謙之方按刑廣東有懷次韻

五年不說空山雨今夜魚梁著釣船為問故人今健否  
枕柳葉暗瘴江邊

何叔京挽章

傾蓋黃亭夜脩然澗壑姿倚天惟直幹到地絕傍枝疊  
疊今何許悠悠只自知寒碑卧風雨千載有深期

附楊廷秀

欽定四庫全書

石倉歷代詩選  
卷一百七十九上

九

和仲良春晚即事

貧難聘歡伯病敢跨連錢夢豈花邊到春俄雨裏遷一  
犁關五秉百箔候三眠只有書生拙窮年墜紙田

蠟梅

粟玉圓雕蕾金鈿細着行來從真蠟國自號小黃香夕  
吹撩寒馥晨曦透暖光南枝本同姓喚我作他楊

雪

夜映非真曉山明不覺遙儘寒無禁爽且落未須銷夢



怯心仍愛顏衰酒易消  
毛錐自堪戰底事乞人饒

又

細聽無仍有貪看立又行  
落時晨轉暗積處夜還明  
幸自漫山好何能到夏清  
似知吾黨意未遣日華晴

中秋前一夕翫月

月擬來宵好吾先此夕遭  
纔升半璧許已復一輪高  
還坐還相就羣飛影莫逃  
望秋惟有此徹夜敢辭勞

過揚子江

祇有清霜凍太空更無吹面荻花風  
天開雲霧東南碧日射波濤上下紅  
千古英雄鴻去外六朝形勝雪晴中  
携瓶自汲江心水要試煎茶第一功

梅花下小飲

今年春在臘前回恠底空山見早梅  
數點有情撩面過一花無賴背人開  
為携竹葉澆瓊樹旋折冰葩浸玉杯  
近節雨晴誰料得明朝無興也重來

克信弟坐上賦梅花

月波成露露成霜借與南枝作淡粧寒入玉衣燈下薄  
春撩雪骨酒邊香却于老樹半枯處忽見一梢如許長  
道是疎花不解語伴人醒醉替人狂

送丘宗卿帥蜀

人似隆中漢卧龍韻如江左晉諸公四川全國牙旗底  
萬里長江羽扇中玉壘頻清開宿霧雪山增重起秋風  
近來廊廟多西帥出相誰言只在東

普明寺見梅

城中忙失探梅期  
初見僧窗一兩枝  
猶喜相看那恨晚  
故應更好半開時  
今冬不雪何關事  
作伴孤芳却欠伊  
月落空山正幽獨  
慰存無酒且新詩

又送張桂州

拋官九載卧柴荆  
有底生涯了此生  
白鷺鷗雙屬玉  
青鞋布襪一苓筇  
贛江府主憐逋客  
樽酒綈袍寫舊情  
天上故人今又去  
碧雲西望暮山橫

深閨

深閨寂寞幾經春  
自學琵琶曲調新  
雪滿寥天悲入塞  
聲傳漢月遠隨人  
芳心有怨聲聲促  
纖指關情字字真  
莫向潯陽江上聽  
空教司馬淚沾巾

閨怨

零落迴文織錦梭  
綺窗殘燭暗銀河  
陰迷小院秋雲重  
響碎空堦夜雨多  
芳夢已離雕玉被  
餘香猶在織金羅  
白頭吟罷增惆悵  
幾度相思鬢欲皤

題釣臺

卷一百七十九上  
蟬冠未必似羊裘出處當時已熟籌但得諸公依日月  
寧妨老子卧林丘賢豪陳迹千年在香火空山萬木秋  
自笑黃塵吹鬢容競來祠下繫孤舟

上龜山寺

菜花開處認遺基荒屋殘僧未忍離寺燼丙丁應有數  
岍分南北最堪悲金鈴塔上如相語鐵佛風前亦歛眉  
野匠不知行客意競磨濃墨打頑碑

明發南屏

新晴在在野花香過雨迨迨沙路長兩度立朝今結局  
一生行客老還鄉猶嫌數騎駝書劄剝喜千山入肺腸  
到得江頭船上望休將白髮照滄浪

夜坐

所至留連不計程兩年堅卧厭南征荒城日短深山靜  
野寺人稀鶴雀鳴藥裹向人閒自好文書到眼病猶明  
較量定力差精進夜夜蒲團坐五更

贈胡衡仲

風騷堂上徑雄趨不作俳辭笑矣乎紙落煙雲春醉旭  
氣含蔬笋薄僧殊夜來霜月千家滿雨後風埃半點無  
安得與君幽討去一觴清詠惱西湖

傷春

準擬今春樂事濃依然枉却一東風年年不帶看花眼  
不是愁中即病中

松聲

松本無聲風亦無適然相值兩相呼非金非石非關竹



萬頃銀濤啓五湖

雨

一番暑雨一番涼真是令人愛日長  
隔水風來知有意  
剛吹十里藕花香

石倉歷代詩選卷一百七十九上

欽定四庫全書

石倉歷代詩選卷一百七十九下

明 曹學佺 編

宋詩五十六下

呂本中

寄臨川學者四首

我思臨川居欲往意未歎每懷二三子歲月多荏苒後  
生慎所習譬若絲在染未須極軒昂且欲知收斂舉動

思古人此志疇不遠以視庸俗輩江海較深淺

世人爭錙銖未語色已變居然面頸赤自處亦猥賤寧  
知烈士冒自有堅志願一介不妄取萬鍾非所羨古人  
有伯夷名冠太史傳

見人輒有求所以百慮非但能守簞瓢何事不可為愚  
夫飽欲死壯士固常飢出門萬里途其亦慎所之

莫惜一日勤而忘終身憂農夫力耕作念必望有秋目  
前戒鹵莽久後當倍收少年不努力長大復何求

出門見明月

出門見明月入門思故人故人如此月一見一回新  
明月相見多故人相見少問爾何因緣長似此月好  
故人在何處南北東西路明月在咫尺夜夜庭前樹

雨後江上有懷

落日滿寒雨長江收夕霏定知聊復別敢望不相違  
野鳥晴相喚殘雲晚自飛殷勤兩山口好為放晴暉

海陵書懷

萬事不如意自然生白鬚極知少餘韻何敢厭窮途土  
俗尊魚婢生涯欠木奴東行見李白誰為致區區

宜章元日

東風初解凍桃李已經春避地逢難日傷時感雁臣城  
南馳敵騎江外踐飛塵顛顛成無用虛煩淚濕巾

雪盡

雪盡寒仍在園荒春欲歸晴空落鴈少古木聚鴉稀肺  
病猶宜酒囊空合典衣碧雲愁不見千里故山薇

送常子正赴名

屬者居閒久今來促召頻但能消黨論便足掃邊塵衆  
水因歸海殊塗必問津如何令強敵敢謂漢無人

其二

疾病老逾劇交親窮轉疎惟公不變舊怪我未安居日  
月干戈裏江山瘴癘餘因行見李白寂莫問何如

還韓城

乍喜全家脫虛疑匹馬奔乾坤德盛大盜賊爾猶存稻

瓏秋仍旱溪流晚自渾素冠兼白髮愁絕更誰論

丁未二月上旬日

厄運雖云極羣公莫自疑民心空有望天道本無知野  
帳留華屋青城插皂旗燕雲舊耆老寧識漢官儀

兵亂後雜詩三首

晚逢戎馬際處處聚兵時後死翻為累偷生未有期積  
憂全少寐經劫抱長飢欲逐英雄後同盟起義師

海上盟猶在長驅出不虞是誰遺此患故使亂中都官



府室如磬人家錐也無有司少恩惠何忍復追呼

蝸舍嗟蕪沒孤城亂定初籬根留故樓屋角得殘書雲路  
慚高鳥淵潛羨巨魚客來闕佳致親為摘山蔬

海陵雜興

紛紛五代亂離偏一旦雲開復見天草木百年新雨露  
車書萬里舊山川尋常巷陌猶簪紱取次園林亦管絃  
人老太平春未老鶯花無恙日高眠

秋後竹夫人

與君宿昔尚同牀正坐西風一夜涼便學短檠牆角棄  
不如團扇篋中藏人情易變仍如此世事多虞祇自傷  
却笑班姬與陳后一生辛苦望專房

探花

謾遣兒童掃雪開却穿籬落看春回溪山冷淡泥三尺  
故舊飄零酒一杯止買芒屨供踏雪更携藜杖去尋梅  
玉川縱老生涯在時有隣僧送米來

謝勝尉送梅

破帷冷落不禁風，疾病深藏太好慵。  
俄有梅花來曲巷，喜聞春信出初冬。  
未須起雪爭光覩，尚恐衝寒不滿容。  
會約君家好兄弟，他年樽酒更相從。

苦雨

雨添東澗連西澗，雲斷前山起後山。  
野水到門人去盡，昏煙迷樹鳥飛還。  
江天日月渾無色，客路風埃只強顏。  
舞石至今隨燕乳，裁詩不復哭龍慳。

柳州開元寺夏雨

風雨脩脩似晚秋，鴉歸門掩伴僧幽。  
雲深不見千巖秀，水漲初聞萬壑流。  
鐘喚夢回空悵望，人傳書至竟沈浮。  
虎頭燕頤非吾相，莫羨班超拜列侯。

西歸舟中懷通泰諸君

一隻一隻路傍堠，乍有乍無天際星。  
亂葉入船侵破衲，疾風吹水擁枯萍。  
山林何謝誰方駕，詩語曹劉可乞靈。  
酒盞茶甌俱不厭，為公醉倒為公醒。

用寄壁上人韻，范元實、趙才仲及從叔知止。

故人瓶錫各西東，吾道從來冀北空。  
病去漸于文字懶，愁來猶覺歲時攻。  
江回夜雨千巖黑，霜著高林萬葉紅。  
政好還家君未肯，莫教慚愧北窓風。

張禕秀才乞詩

白蓮菴中張居士夢斷世間風，  
馬牛風塵表物自無意。  
神仙中人聊與遊，澄江似起北城眺。  
苦雨不放南山秋，君當先行我繼往。  
句吳東亭泊小舟。

孟明田舍

金  
卷一百七十九下  
未嫌衰病出無車尚喜冬來食有魚往事高低孤枕夢  
故人南北數行書茅茨獨倚風霜下稷稻微收雁鷺餘  
欲識淵明只公是邇來吾亦愛吾廬

雨後至城外

日日思歸未就歸只今行路已沾衣江村過雨蓬麻亂  
野水連天鶴鶴飛塵務却嫌經意少故人新更得書稀  
鹿門縱隱猶多事苦向人前較是非

宿州初暑

暑氣侵人始欲愁，  
簾窳窮巷不堪憂。  
亂蟬泊雨林塘靜，  
密徑吹花草樹幽。  
春盡茆簷深著燕，  
日高田水故飛鷗。  
莫欺湫隘無餘地，  
待借元龍百尺樓。

春靜

花氣自來深戶裏，  
鳥聲長在遠林中。  
班班葉影垂新蔭，  
曳曳絲光入素空。

採春

搖曳風頭欲振枯，  
柳梢垂髮不勝梳。  
從來輕薄纔先發，

誰記秋霜墜葉初

無題

異域安知鼎重輕禍胎元是漢公御襄陽耆舊惟龐老  
受禪碑中無姓名

附胡銓詩

字衡仲  
號澹菴

和林和靖八梅

感時濺淚幾時乾顧影伶俜獨立難自恐迹孤無與對  
誰憐族冷不勝寒未應一世供愁斷長願三更秉燭看



雨過花邊行更好猶嫌子美借銀鞍

其二

風亭小立夢初殘步步凌空對廣寒照眼雙明清可掬  
閒情一味澹相看曉縈瑞霧黏初潤晴映高雲薄未乾  
三嗅臨風思無限藥宮遙夜酒初闌

其三

暗裏尋春自不迷照空馬用夜然臍欲危疎朶風吹老  
太瘦長條雨颭低孤艷幾時同把盞野香猶記助看題

唐人未識高標在浪自紛紛說李蹊

其四

瘦吟幽翫有餘妍更向高人獨樂園無垢未應經露沫  
不溜寧信受塵昏春風自識明妃面夜雨能清水部魂  
揀向膽瓶看更好凜如明水薦霜樽

其五

當年曾見鳳城頭入骨貪看興未休小摘欲論千種恨  
微吟先喚一番愁每嫌俗物薰心醉長願清馨滿世留

穠李倚風梨帶雨比方應合面驛羞

其六

縞屨練帨照釵荆霜竹寒松秀色并八詠格高凌太白  
千林地迥切西清着枝有味知深意歌屋無言似薄情  
日暮水邊空悵望渾如湘浦見皇英

其七

一年佳處早梅時勾引風情巧釣詩未分霜凌禁瘦朶  
漸看春入奈愁枝晚尤竒特憐無伴夜欠分明祇自私

冷落便須憑酒煖從今鄒律未消吹

其八

紛紛紅紫勿相猜自古騷人酷嗜梅  
皐蓋折花憐老杜黃梅時雨憶方回  
一生耐凍天憐惜滿世趨炎我獨來  
桃李爭春身老大急須吟醉莫停杯

追和東坡雪詩

為瑞應便種麥鴉餘光猶得映書車  
也知一臘要三白故作六翼先百花  
授簡才慳慙賦客披蓑句好憶漁家

擬酤斗酒聽琴操三百青銅落畫叉

過三衢呈劉其父

別離如許每引領邂逅幾何還着鞭微服過宋我何敢  
大國賜秦公不然衰髮凋零已子後高名萃律方丁年  
即看手握天下砥山中宰相從雲眠

雷州和朱或秀才詩時欲渡海

何人着眼覩征驂賴有新詩作指南螺髻層層明晚照  
蜃樓隱隱倚晴嵐仲連蹈海徒虛語曾叟乘桴亦謾談

爭似澹菴乘興往銀山千疊酒微酣

和李參政泰發送行韻

落網端從一念差崖州前定復何嗟萬山行盡逢黎母  
雙井渾疑到若耶山鬼可人曾入夢相君談易更名家  
此行所得誠多矣更願從公北泛槎

遊白龍洞

懸崖怪石水潺潺宜有神龍隱此間窮勝不妨歸險洞  
尋春那止看羣山攀龍行即天邊去躍馬駢同野外還

好景良辰適相會一樽聊共水雲閒

買愁村

北往常思聞喜縣南來怕入買愁村區區萬里天涯路  
野草芳煙正斷腸

按公力闢和議上書乞斬秦檜坐竄嶺海二十餘年  
檜死乃移衡州張宣公謂秦檜之柄國如此其久只  
成就得胡澹菴一人孝宗始召用至從官

石倉歷代詩選卷一百七十九下



欽定四庫全書

石倉歷代詩選卷一百八十

明 曹學佺 編

宋詩五十七

朱松

題蘆雁屏

征鴻坐何事天遣南北飛蕭然如旅人無情自相依孤  
葦吹欲折秋風不勝威冥冥一高雁空費弋者機寒聲

落煙渚相應不我違嗟余識此情納手空歎歎

於潛道中

山行厭聾確理策扶歌危綠野三兩家一息知可期  
丹層林端炊煙裊晴暉其民豐且樂恐是太古遺那知  
都邑間百索困鞭笞繁華今何有半作道傍羸

度芙蓉嶺

幽泉端為誰放溜雜琴筑山深春未老泛泛浪蘂馥娟  
娟菖蒲花可玩不可觸枯根盤翠岬老作蛇蚓處褰裳

踏下流濯此塵土足何當餌香節淨洗心眼肉餘功到  
方書萬卷不再讀晚歲窮名山靈苗縱穿劓

坐睡

坐久睡屢兀手失未了書清風脫然至心醒得我娛起  
看孤隙光了不移錨銖云何短夢中萬境生須臾嗟彼  
市朝子百巧營其軀安知非夢境過眼滅無餘

遊山光寺

寺藏兩山腹路轉百步陰登高試病脚掬冷清煩襟危

壁龕石刻歲月不可尋  
屋古困枝柱摧頽力難任何當  
咄嗟辦嗣彼鐘梵音興衰豈吾預  
得酒且滿斟歸路有溪月俛仰閱古今

效淵明

人生本無事况我麋鹿姿  
一墮世網中永與林壑辭  
此行獨何事豈不為寒飢  
弱歲慕古人頗覺世好卑  
那知齒髮邁終然此心違  
春風到山澤魚鳥亦知時  
吾行何日休流目瞻長歧  
且用陶翁言一觴聊可揮

戲答胡汝能

我生苦中狹與世柄鑿乖平生素心人耿耿不滿懷汝  
能伯始後遊世如嬰孩相逢握手語便作塌窳諧時時  
笑謂我如子惠未涯執古以稽今求合誠難哉涉世幸  
未遠子車尚可回不見山巨源雍容居鼎台寥寥嵇中  
散絕交良可哀

謁吳公路許借論衡復留一日戲作

幽獨不自得駕言欵齋廬殷勤主人意投轄恐回車世

途早已涉此去將焉如惟憂酒錢盡使我詩腸枯會合  
曾幾何可復自為疎更當留一夕帳中撥異書

書窗對月

天公自厭雨一夕開寒晴霜風淨曠野搖落有餘聲飢  
鴉得林靜霽月縈窗生故人千里餘濁壺誰與傾遙知  
勸影醉共此通夕情明年溪上路來餉雨中耕

用退之韻賦新霽

春泥窳幽步苔上履痕少新晴一褰衣綠葉藏啼鳥方

塘澗宿漲古鏡窺清曉華顛忽自笑綵羽墮驚矯瞻言  
雲中叟所耕在縹緲歸把東臯犂此念何日了

送金確然歸弋陽

昔我雲溪居送子雲溪濱重來問何時笑指溪上雲一  
別四周星坐此世故紛衰顏兩非昔華髮粲可耘我纏  
風樹悲終日無一欣子乃水菽憂南北奔走勤對牀語  
未終別意如絲棼歸夢尚隨子何當歎離羣

用前韻答翁子靜

金八八八三三三  
卷一百八十  
客心既岑寂節物亦倥偬幽籬菊初暗深壑梅已動松  
喬節磊砢鶴老格清聳當知山澤臞誰羨將相種一官  
戲人間叢書以自擁微言聞緒餘三歎手輒拱青天本  
寥廓不受雲霧消願言及清明茗盃不辭捧

微雨

端居身百憂况乃貧病俱天公頗相哀雨我蔬藥區曉  
霽新青勻日薄生意蘇衛生固未必一飽行可圖故園  
天一涯茆荆誰為鋤崢嶸歲云晚此念當何如



寄題叔父池亭

一壑久藏勝數椽，忽開亭方塘蔭瓦影淨，見魴鯉行主。  
人有嘉招，轉枕失高城，不知幾搖兀。杙舟上崢嶸，尊酒  
酌芳淥，園蔬煮柔青。翩翩射鴨弓，一笑鬪綵翎。那知海  
陬役斗粟，忘歸耕餘生。信萍梗歸夢，識林垆漲水，有回波  
故鄉，豈無情。一醉會茲日，因之濯塵纓。

春日與卓民表陳國器步出北郊

灼灼桃吐華，濯濯柳垂縷。芳菲挽人出，春工乃如許。嗟

余閉門久佳節過不數伴擬山陰勝詩作斜川語誰言  
一尊酒妙指合千古歸來讀殘書耿耿霜月苦空餘流落  
心三歎非吾土

和謝綽中觀瀾亭

方塘灑宿漲曲澗來飛湍光涵蔚藍天瀕洞碧玉寬小  
亭塵土外瓦影浮朱欄霜渚寫秋色煙林養漁竿佳人  
秋霞衣皎皎明月冠欲濯且無塵隱几得妙觀海若眩  
河伯等在蝸角端那知坳堂上盃水生濤瀾

寄題陳國器容膝齋

淵明乃畸人遊戲于塵寰南窗歸徙倚宇宙容膝間豈  
不念斗米折腰諒匪安是非無今昨飛倦會須還之子  
青雲姿逸志追孔鸞曲肱數椽底尚友千載前規摹琴  
書室料理松菊緣要知丘壑志本出軒裳先瑣闥麗宸  
居追飛詎云艱回車莫待遠泉石聞此言

答保安江師送米

不見道人久天涯歲云除朝來食指動忽接送米書念

師折脚鐺五合未省餘雖無覆餗禍尚有乞食通云何  
憐孤客日受飢火驅未曾貸監河矧肯索胡奴嗟余事  
筆耕輕棄南畝鋤恩煩方外客此計良已疎何時事粗  
了歸葺五畝居生涯寄緯竹豈即非良圖

梅花

山深春未動沙淺水欲冰玉梅於此時靚粧畧無朋霜  
藥繁的皜月枝掛鬚髻儼如江漢女可愛不可陵聊分  
窺水影依我照字燈昔如夢中蝶今學桑下僧見此苦

提長勿詢曹溪能

久雨短句呈夢得

身閒書有味吏傲俗不親  
小窗據物表掃盡心眼塵  
令尹垂珠玉敲門喚行春  
作意向芳物吾車曾未巾  
愁陰入病骨鳩婦聲亦嗔  
冥冥三日雨桃李迹已陳  
眼中醉鄉路風味良獨醇  
流光不容玩尺璧何足珍  
滴俗益可厭願言勤問津

芭蕉

金史卷一百八十  
地鹵不敏樹珍植何由暢劇根移芭蕉美蔭歧可望芳  
心日卷書翠葉忽張王偏工鳴秋雨疎密眇難狀霜風  
一以厲狼籍坐惆悵誰言縑縷中秋子得佳餉緗囊貯  
瑞露厚味天所貺懷哉腊毒言節口畏生瘴

菖蒲

東山在蒼宇未到心鬱紆流泉撞哀玉清冽生菖蒲聞  
有嬋娟子棄家來結廬窈窕雲霧窗參差冰玉膚絕粒  
餠香節仙姿清且腴邇來隱身去冷落愁臞儒靈方無

由乞石斗移根鬚相看意已消何必見子都

奉和胡德輝八月十四日夜翫月次韻

我夢故山月蘿影垂秋光誰言九衢曉莽莽吹塵黃羣  
公直道山晤語清夜央飛轍轉空濶積暑蘇蒼涼哦詩  
中天律流光惜堂堂新寡社酒熟狎宴何時忘

其二

亭亭月初高河漢坐可褰病餘久制酒灑氣兩爭先振  
衣萬里風歸袖何時翩懷哉故山友共此今夕圓離離

雲飛鴻何意影沈川觀心要如是出處直悠然

中秋夜雨

秋雲定何心恐翳今夕月尚嫌微點綴况乃都漫滅他  
時任氛霾此際望清徹倦投衲子窗竹雨聽騷屑對牀  
不成夢有酒那能設螢飛矜意氣蟲語轉幽咽心知層  
陰表皎皎玉輪潔何當凌倒景徙倚玩飛轍

曉過吳縣

舟行有嚴程越國常曉發雙櫓兀殘夢起坐窺落月人



家岼野水霧雨籠  
邃閣遙憐瑣窗人  
歌枕聽甌軋

新秋

幽人無與娛耳中  
百不聞新米熟未  
知但覺市酒醇滄  
洲散秋色山水逾  
清新一醉不忍獨  
念我存故人

道中得雨

我行田野際吁嗟  
連數村千山收宿  
雨溪水黃梅渾漸  
看風葉底一洗龜  
坼痕餘功被行客  
稍壓車塵昏

秋懷六首

秋風未幾日我髮白已多千林了未覺奈此一葉何安  
坐惜流光斜盼寄庭柯寒蟲獨何者唧唧夜自歌

月林疎愈明露草淨可拭飛飛螢遞照軋軋蟲自織移  
燈檢書讀千載如經夕微言契夙心妙解失陳迹文章  
事雕琢回視真兒劇世無揚子雲此理誰見直

林臯片葉脫靜土最先知自我抱茲獨悠然星氣馳乾  
坤一逆旅鼎鼎竟何為枯榮俯仰中兒輩浪自悲青雲  
渺難必白髮不可辭得飽良已泰雨畦瓜芋肥

庭柯一葉失風挾涼氣歸湛湛陂中青芙蓉脫紅衣非  
無岑寂士句法妙玄暉獨懷履霜戒德人貴知微

市朝富危機匹夫死憑河何如狎鷗子煙雨一滄波行  
藏各有趣不在相詆訶我師陋巷人千古冠四科

穿堵趨玉繩影倒夜窗寂火雲一洗空月露清欲滴幽  
人負疴卧起坐三歎息歸同對牀第晤語永佳夕

次韻

掩關味詩書青簡亦已槁相携出東城及此風日好僧

簷覆谿淥共取一尊倒眷此松桂陰不接車馬道殷勤  
玩流光齒髮行且老

五言

丹白春事了灌木忽暗園卷書護岑寂幽鳥時一喧起  
携無事酒往扣常關門豈無素心人之子不可諼

巖桂花

開門驚積葉秋氣日以厲獨芳搖落中粲粲巖下桂幽  
姿不自憐惆悵紛滿地未忍蹋殘英何以娛晚歲

解返舟

上國經年客，春流一棹波。  
已醒離帳酒，猶記客亭歌。  
野枕殘歸夢，霜衾擁獨哦。  
篷窗橫落月，作意傍人多。

淮南道中微雪

密密雲陰合，斜斜雪態妍。  
似欺春力淺，故傍客愁邊。  
宿鳥投村暝，寒梅抱藥鮮。  
無人命尊酒，清絕裊茶煙。

東陽社日泛舟觀競渡

誰喚思家客，來為蕩漿嬉。  
鬢華羞照水，雨意解催詩。  
疊

鼓飛文鷁香鬟出短籬醉歸真夢覺猶憶湔裙時

春晚五言寄夢得

美景殊可惜殘春猶不堪晚英餘燕蹴殘顆墜鴛含歲  
月蓬雙鬢生涯粟一甌惟思對公瑾把酒話江南

辛亥中秋不見月

今夕九秋半心期負隔年勞生灰劫裏微雨客遊邊旅  
泊正無酒陰雲遑怨天何時草堂月相對藉槽眠

飲梅花下贈客

憶挽梅花與君別終年夢掛南臺月天涯谿上一尊酒  
依舊風枝舞香雪高情絕艷兩無言玉笛冰灘自幽咽  
且當醉倒此花前猶勝相思寄愁絕

西湖泛舟

望湖樓下照衰顏羞見塵埃兩鬢斑風艇縱看山轉側  
煙堤儘逐水回還喚人歸去城鐘急觸處相親嶺月彎  
不用新詩摹絕境定知長到夢魂間

和人遊仙峰菴

千巖萬壑翠縈回一洗衰翁病眼開落日多情留別嶺  
秋空無地着浮埃雲閒出岫那經意松老參天豈願材  
我是散仙君記取莫鞭鸞鳳少徘徊

次劉彥仲傅茂先韻

強蹋府塵從傅子立談江閣識劉郎一樽此地見蒼宇  
十載相思成鬢霜秋燈煜煜照情話夜浪翻翻吹客牀  
投名徑入農圃社老矣不夢天門翔

送蘭廷彥之衡州



墻東新徑去年開  
二老扶筇便往來  
數面何曾三日別  
離懷都寄十分杯  
容亭繫馬梅爭落  
官舍裁書雁欲回  
見說雲霄有知己  
那須卜築向蒿萊

竹齋

誰云山僧貧而有千椽  
玉幽眠豈無趣愛此晴窓綠

懷劉園作

一與劉園別春風到海隅  
墻陰草爭綠留得屐痕無

太康道中

一色春勻萬樹紅坐愁吹作雪漫空誰知榆莢楊花意  
只擬春殘卷地風

春晚二首

梅子生仁柳絮催春風塵迹只蒼苔繁華一夢年年事  
長是初鶯為喚回

客路歸來芳節闌杖藜隨處小盤桓危紅數點藏深綠  
須作春風爛熳看

遊妙峰菴二首

朝暖南岡一杖藜，忽投深壑得禪栖。  
共言伐翳通樵徑，後日重來路恐迷。

手開茅棘養疎慵，不著塵中車馬蹤。  
只許幽人來別嶺，卧聽巖磴響枯筇。

勻道人之玉山戲作兩小詩送之

道眼無塵萬景隨，滄江秋色入新詩。  
歸時人問江南好，只道君行到自知。

頗憐胸次抱經緯，半縷不上山龍衣。  
誰知煙雨暗青笠。

得意雲水春霏微

芍藥

已分春光冉冉過  
奇葩好去奈愁何  
誰令玉頰成紅點  
如意痕深琥珀多

春日

夢和殘月兩朦朧  
饒舌幽禽苦喚儂  
若說五更春睡好  
絕勝騎馬火城中

石倉歷代詩選卷一百八十